

se sopra questa materia, per la qual andò una altra volta.

Questa morte del re Ferando di Ragona fo divulgata per la terra a hore una di note. Questo Re naque dil 1448 a di . . . sichè havia anni . . . Non ha fioli, sarà garbujo nel regno maxime di Ragona, dove è l' infante Fortunà ch'è zerman dil Re predito, qual è ben voluto. Di quel di Castiglia, ch'era di la moglie e heriedi, l'archiduca Carlo di Borgogna, ch'è in Borgogna; ma in Spagna in la corte dil Re si trova il secondogenito don Ferando, qual è ben voluto da li primi di Castiglia. *De facili* si potrà far Re etc. In reame de Napoli è il vicerè don Ugo di Cardona, ch'è bastardo di dito Re, et *de facili* si vorà far lui re di Napoli; sichè sarà gran novità. Qual sarà, piacendo a Dio si vederà più avanti. *Unum est*, questa nova è molto a proposito a le cosse nostre, e farà forsi mutar pensier di le cosse di qui a l'Imperador per voler andar ajutar soi nepoti di Borgogna, et il conte di Chariati, ch'è in Verona, farà novi pensieri.

Fo dito, dito conte di Chariati, questo carlevar domandò a li citadini li soi arzenti, dicendo voler far festa in palazo, e abuti, finse esserli venuto letere di l'Imperador, per il che bisognava trovar danari per mandar a Brexa, però li era necessario tenir parte di arzenti e meterli in zecha e far danari; per la qual cossa li citadini restono malecontenti etc. *tamen* non è letere di questo a la Signoria, *solum* di la carestia dil vin, val in Verona ducati 12 la bota. Et hanno pochissimo strame; et ch'el signor Marco Antonio Colona si doveva levar e non star più li; et che quelle zente, è in Verona, doveano ussir etc.

Fo mandato in campo questa sera ducati 4000.

*A dì 12.* La matina, l'orator di Ferara fo in Colegio in materia di burchi di sali, e fo letere di Ferara di Hironimo Dedo etc.

Vene *etiam* el conte Otto Visconte, fo fradelo del signor Sagramoso, qual havea questo Otto 100 homeni d'arme con il signor Bortolamio da Alviano.

Fo cavato, con li Cai X, tre di quelli restano a dar de l'impresto: sier Nicolò Vendramin electo podestà et capitano a Treviso, qu. sier Polo, sier Andrea Trivisan electo a le Raxon vechie qu. sier Polo e sier Bertuzi Contarini electo podestà a Porto Gruer di sier Domenego, et mandato amonirli vadino a pagar, *aliter* si farà in loco suo.

Da poi disnar fo Pregadi, et poi leto *le letere vene di campo da Lonà, di sier Andrea Griti procurator, provedador zeneral, di 10, hore . . .*

*di note.* Del suo ritorno li da Salò dove à pagato li brisigelli, et à ruinato l'ordene se' il signor Bortolamio di manipoli etc. *Item*, trova molti capi e fanti reduli a provisione, che saria bon conzar etc. *Item*, ha ricevuto li ducati 5000 mandati di qui, et li 4000 da Milan et 3000 di Bergamo. *Item*, vole se li manda di altri, perchè il signor Thodaro e quelli capitanei dize vol aver honor etc., et si tirerano più sotto Brexa. *Item*, scrive di la nova di la morte del re di Spagna auta per l'orator dil Re, data a di 5 a Terascon in Provenza verso Lion, drizata a monsignor di Lutrech etc.

Fo leto ancora una altra *letera dil Re di 2, drizata al dito sier Andrea Griti*, li dà titolo procurator provedador et cavalier. Risponde è contento soprastar tre mesi, poi la suspension fece a quanto à richiesto, azjò si atendi a ultimar l'impresa di Brexa e di Verona *ut in litteris*; qual stima sua propria.

Fo leto le letere di Costantinopoli, et tra li altri avisi notadi di sopra, è come era venuto dal Signor, in Andernopoly, uno nontio di l'Imperador a dissuader il Signor non voji dar ajuto a la Signoria, e il Signor l'ha fato meter in preson etc. *Item*, come ancora il Signor non ha terminato qual homo vol mandar a la Signoria; ma ben ha inteso voleno mandar uno homo a certificar l'armada fanno non è per mal contra la Signoria nostra.

In le letere di campo, è uno aviso: è contento 299 monsignor di Lutrech e quelli regi la Signoria tegni solo fanti 6000 et darano fama di 8000, et loro hanno 10 milia et 800 lanze. *Item*, nostri fanno fortifichar Anpho e la rocha, e métendovi dentro fanti 300, lo voleno tenir contra cadauno.

Fu posto, per li Consieri, Cai di XL e Savi, suspender li debiti di sier Jacomo Contarini qu. sier Baptista per do anni. Fo presa, *videlicet* quelli l'è con la Signoria; il qual per debito stà in casa. 160 di si, 29 di no.

Fu fato la commission di sier Andrea Trivisan el cavalier, mandato ambasador a Milan per forma, et preso possi portar arzenti a risego di la Signoria nostra per ducati 400.

Posto *etiam*, per li Consieri: sier Andrea Griti procurator, provedador zeneral, possi tenir arzenti per ducati 400, a risego *ut supra*. Ave 127 di si.

Fu posto, per il Serenissimo, sier Marco da Molin, sier Hironimo Tiepolo, sier Bortolamio Contarini cassieri, sier Lorenzo Gixi, sier Jacomo Sorianzo, sier Lorenzo Vituri cai di XL, sier Antonio